



**KABO EA LICHELETE EA
SELEMO SA 2017/2018**

04/08/2017

**“Kabo ea Lichelete Nakong e Thata
ea Tlhokahalo ea Botsitso
Lipolotiking le Tšireletsong ea Naha”**



LEKALA LA LICHELETE

Mantsoe a Etellang pele a Letona le Khabane la Lichelete

Ke thabile ho le amohela nakong ena eo le balang bukana ena ea sechaba ea kabo ea lichelete, ea selemo sa lichelete sa 2017/2018. Bukana ena, e ngotsoe le ho hatisoa ho thusa Basotho ho rua tsebo ka kabo ea lichelete tsa sechaba le hore merero ea ntlafatso e raloang ke 'Muso, e etsetsoa sechaba ka kotloloho. Ke selemo sa bobeli Lekala la Lichelete le hatisa buka ena, e ngotsoeng ka mokhoa o bonolo, ho hlalosa sechaba ka kabo ea lichelete. Ke boikarabelo ba rona ho hlalosa sechaba hore na re rerile ho fumana lichelete tseo kae le ho li sebelisa ho etsa eng.

Kabo ea lichelete, ke sesebelisuo sa seo 'Muso o phethahatsang maano a oona ka sona. Sepheo sa rona sa ho phatlalatsa kabo ena ea lichelete, ke ho thusa sechaba ho utloisisa hore na kabo ea lichelete e raloa le ho tsamaisoa joang. Hona ho etsa hore bukana ea kabo ea lichelete ebe e nang le ponahetso, e ka fumanoang ke Mosotho e mong le e mong, 'me e fanang ka kutloisiso ea hore na kabo ea lichelete e raloa joang. Bukana e lokela ho thusa Mosotho ho hlalloba hore na maano a 'Muso a na le litholoana tse molemo le ho mo fa monyetla oa ho hlalosa maikutlo a hae. Bukana ea kabo ea lichelete e hlalosa se tlang ho etsoa ka lichelete tsa sechaba, mesebetsi e tla ba ka sehlohong nakong ea selemo sa lichelete sa 2017/2018, le ho bontša bohlokoa ba hore sechaba se be le kabelo mosebetsing oa ho rala kabo ea lichelete.

Kabo ena ea lichelete e etsoa nakong e thata haholo eo re shebaneng le liqholotso tsa tlhokahalo ea botsitso lipolotiking le tsireletsong ea naha. Liqholotso tsena li hloka boetapele bo nang le tšebeliso-'moho esita le litsi le makala a nang le boiphihlelo.

Selemo sa lichelete sa 2016/2017 e ne e le sa ho qetela sa Moralo oa Naha (NSDP).

Selemo sena sa lichelete sa 2017/2018 e tla ba seo ka sona re tla rala NDSP e ncha.

Ke lakatsa ho leboha bohle ba kentseng letsoho tšebetsong ea ho buisana le ho rala kabo ea lichelete selemong sena. Lipuisano tsena li tla re thusa ho hloaea mesebetsi ea bohlokoa, e lokelang ho etsoa pele, ho latela khaello ea rona ea lichelete. Ha ho lebaka le ka re thibelang ho atleha leha re tobane le mathata a kenyeletsang moruo o tetemang oa lefatše, ho fokotseha ha lichelete le lithuso tse tsoang ho bafani, le keketsheho ea lichelete tsa meputso ea basebetsi ba 'Muso. Ke na le tšepo ea hore Bukana ena ea kabo ea lichelete e tla thusa sechaba ho rua tsebo ka tšebetso ea ho rala kabo ea lichelete le ho se khothaletsa ho fana ka maikutlo a sona mosebetsing oo. Tsena li tla etsa hore sechaba se utloisisa hore kabo ea lichelete le meralo ea 'Muso, ke boikarabelo ba sona ebile e molemong oa bona e le Basotho. Hona ho tla etsa hore meralo le kabo ea lichelete li ikamahanye le litakatso le lithoko tsa sechaba ho ntlafatsa maphelo a sona. Ke ka hoo ke ipiletsang ho Basotho bohle ho tsoela pele ho kenya letsoho tšebetsong ea ho rala kabo ea lichelete tsa bona.

Dr Moeketsi Majoro

Letona la Lichelete

SELELEKELA

Bukana ena ea kabo ea lichelete e hlalosa, ka mokhoa o bobebe, moralo oa tšebeliso ea lichelete tsa 'Muso selemong sa lichelete sa 2017/18. Ha re bua ka "kabo ea lichelete tsa 'Muso" re bolela khakanyo ea selemo le selemo ea lichelete tsa tla kena mokotleng oa 'Muso, le khakanyo ea lichelete tse tla sebelisoa ke 'Muso. Likhakanyo tsena li lokela ho tekoa kapele ho Paramente le ho amoheloa ke Paramente. Sepheo sa likhakanyo tsena ke ho phethahatsa liqeto tsa 'Muso tsa ho fihlela meoloane e behiloeng. Kabo ea lichelete e supa lintlha tseo 'Muso o li behileng ka sehlohong ho ntlafatsa litšebeliso le maphelo a Basotho.

Kabo ena ea lichelete e ipapisitse le maano a latelang: Chebelopele ea Selemo sa 2020; Lipehelo tsa Ntlatso ea Moshoelella (SDGs); le Moralo oa Naha (NSDP).

HO BOLELOA ENG KA KABO EA LICHELETE?

Kabo ea lichelete ke moralo oa lichelete tse tla kena ka mokotleng oa sechaba le lichelete tse tla sebelisoa nakong ea likhoeli tse 12, e leng ho tloha ka la 1 'Mesa ho fihlela ka la 31 Hlakubele. 'Musu o etsa moralo o bontšang hore na o tla bokella lichelete tse kae le hore na o tla abela makala a fapakaneng lichelete tse kae. 'Musu o bontša hore na lichelete tsa likhafa, lichelete tse tsoang ho bafani, le lichelete tse alimiloeng li tla sebelisoa joang. Kabo ea lichelete e shebana haholo-holo le lintlha tsa bohlokoa sechabeng tse kenyeletsang tse latelang: Kholiso ea Moruo; Temo; Thuto; Bophelo; Meaho le Litsela; Lipenchene tsa Maqheku, Lithuso tsa Batho ba Tlokotsing, le Likoluo. Kabo ea lichelete e raloa ho ipapisitsoe le moruo oa naha esita le oa lefatše ka kakaretso. Kabo ea lichelete e angoa ke moruo oa naha le tsela eo e raliloeng ka eona. Mohlala; ha moruo oa naha o tetema, sechaba ha se na ho ba le mesebetsi kapa chelete. Ha maemo a le ka tsela ena, lichelete tse kenang ka mokotleng oa sechaba li tla theoha 'me ho tla ba le khaello ea lichelete.

CHELETE E ABELOANG SECHABA KE BOKAE?

Kakaretso ea chelete e abeloang sechaba selemong sa 2017/2018 ke limilione tse M18,709.3. Chelete ena, e nyolohile ka 7% ha e bapisoa le ea selemo sa 2016/2017 e neng e le limilione tse M17,423.8. Kakaretso ea chelete e sebelisoang selemo le selemo e nyolohile ka 9%, ha Sekoloto sa Sechaba se nyolohile ka 15% ho tloha ho limilione tse M867.0 selemong sa 2016/2017 hoisa ho limilione tse M995.7 selemong sa 2017/2018. Lichelete tse Sebelisoang Mesebetsing e Mehlo li nyolohile ka 3% ho

tloha ho limilione tse M5,064.7 selemong sa 2016/2017 hoisa ho limilione tse M5, 202.6 selemong sa 2017/2018. Lichelete tse Sebelisoang Selemo le Selemo li nyolohile ka 7%. Lebaka ke hobane lichelete tse kenang ka mokotleng oa 'Musu tse tsoang ho bafani li theohile.

Kabo ea Lichelete tsa Selemo sa 2017/2018	2016/2017	2017/2018	% Phetoho
Chelete e Tsoang Mokotleng oa 'Musu	17 423.8	18 709.3	7%
Kakaretso ea Lichelete tsa Meputso le Lits'ebeletso	12 359.1	13 506.7	9%
Lichelete tsa Meputso le Lits'ebeletso	9 865.2	10 643.6	8%
Chelete ea Liofisi tse Thehiloeng ka Molao	1 526.9	1 767.4	16%
Chelete e Lefang Mekoloto	544.3	638.6	17%
Tsoala holima Mekoloto ea 'Musu	322.6	357.2	11%
Chelete ea Tsamaiso ea Litsebeletso	100.0	100.0	0%
Chelete ea Ntlatso	5 064.7	5 202.6	3%
Mehloli	15 473.9	16 774.3	8%
Likhafa le Litafello tsa Litsebeletso tsa 'Musu	13 370.8	14 994.8	12%
Lichelete tsa Bafani	1 169.5	1 072.2	-8%
Likalimo tse Tsoang Kantle ho Naha	933.6	707.3	-24%
Khakanyo ea Khaello	-1 949.9	-1 935.0	-1%

CHELETE E ABELOANG SECHABA E TSOA KAE?

Pele 'Musu o ka etsa qeto ea lichelete tse tla sebelisoa, o lokela ho tseba mehloli ea chelete eo. Mehloli ea lichelete e ka ba e kahare ho naha kapa e kantle ho naha.

MEHLOLI E KAHARE HO NAHA


Tebello ea rona ke hore re batla chelete e limilione tse M14,994.8. Likhafa tsa malibohong (SACU) li tla kenya limilione tse M6,154.2, likhafa li tla kenya limilione tse M7,604.3 ha lichelete tse ling tse sa tsoeng likhafeng li tla kenya limilione tse M1,236.3. Ka kakaretso lichelete tse kenang ka mokotleng oa 'Musu li tla nyoloha ka 12% ha li bapisoa le tsa selemo sa 2016/2017 tseo e neng e le limilione tse M13, 370.8.

MEHLOLI EA LICHELETE TSA BAFANI TSE HLAHANG KANTLE HO NAHA:

Ho na le lichelete tse fanoang mahala ke bafani. Selemong sa lichelete sa 2017/2018, ho lebeletsoe hore e tla ba limilione tse M1,072.2. Lichelete tsena li theohile ka 8% ha li bapisoa le tsa selemo sa 2016/2017.


MEHLOLI EA LICHELETE TSE ALIMILOENG KANTLE HO NAHA:

Tsena ke lichelete tse alimiloeng mebusong e meng le mekhatlong ea lefatše. Ke lichelete tse lokelang ho lefshoa. Selemong sa lichelete sa 2017/2018, mekoloto e lebeletsoe ho etsa limilione tse M707.3, mokoloto ona, o theohile ka 24% ha o bapisoa le oa selemo sa 2016/2017.




SETŠOANTŠO SA TŠEBELISO EA LICHELETE

Lichelete li abelo a makala a fapakaneng - bophelo, temo, meaho le litsela, thuto, le makala a mang. Makala a 'Muso, Puso ea Libaka le Litereke li lokela ho sebelisa lichelete li ipapisitse le melao e reretsoeng ho thusa sechaba ho fihlela meralo ea sona.



CHELETE E TLA SEBELISOA JOANG?



Ho latela meralo ea lona, Lekala la Khoebo le Mesebetsi e Moholo le tla nolofatsa mekhoha ea khoebo le ho fumana mebaraka ea thepa e tsoang Lesotho, ho ntlafatsa le ho aha tsohle tse lokelang ho sebelisoa ho theha lifeme, le ho etsa tsohle tse tla nolofatsa bahoebi le batseteli ho theha mesebetsi e meholo le lifeme.



Lekala lena le tla abelo a limilione tse

M194.8.

'Muso o ikemiselitse ho matlafatsa likhoebo tse nyenyane le tse mahareng e le mokokotlo oa ntlafatso ea moruo. Kabo ena ea lichelete e tla sebelisoa ho thehoa hoa likoporasi le likhoebo tse nyenyane le tse mahareng. Lichelete li tla sebelisoa hape ho theha mesebetsi bakeng sa bacha, basali, le lihlopha tse ling tse tlokotsing ka sepheo sa ho fokotsa bofuma le palo ea batho ba sa sebetseng. E le ho phethahatsa sepheo sena, ho tla sebelisoa chelete e limilione tse M112.0 ho aha limmaraka, lisiu tsa lijalo tse kotutsoeng, lilakhapane, le ho ntlafatsa libaka tsa khoebo tsa BEDCO le tsa Lesotho Cooperatives College.

Palo ea bahahlauli, ba tsoang linaheng tse nang le bokhoni litabeng tsa moruo, e ntse e eketseha. Lesotho le na le monyetla oa ho holisa khoebo ea bohahlauli e ka eketsang moruo oa Lesotho. Lesotho le na le lintlha tse ka hohelang bahlauli tse kenyeletsang botle ba naha, lithaba le ho phahama ha naha, esita le meetlo ea sechaba e khetholohileng. Lintlha tsena li ka thusa ho holisa le ho hohela batseteli. Kahoo, Lekala la Bohahlauli, Tikoloho, le Bochaba le abetsoe limilione tse M220.8.



Nakong ena ea liphetofo tse kholo tsa maemo a leholimo, Lekala la Temo le Kanetso ea Lijo le thusa lihoai ho sebelisa mekhoha e khotlaetsoang 'me e ikamahanyang le liphetofo tseo tsa maemo a leholimo. Lekala le tšehetsa lihoai ka litšebeliso le lisebelisoa tsa temo. Lekala lena le abetsoe limilione tse M483.4.



Selemong sena sa lichelete, 2017/2018, Lekala la Metsi le rerile ho qetela tlhopho-bocha ea Leano la Metsi le Likhoerekhoere

la 2007 le Molao oa Metsi oa 2008. Lekala le tla tsoela pele ka litšebeletso tsa hore metsi a be teng ka linako tsohle le ho fokotsa khoholeho ea mobu. 'Muso o tla tsoela pele ho tšehetsa mesebetsi ea phepelo ea metsi le likhoerekhoere metseng ea literopo le e kathoko ho literopo. Merero ea litšebeletso tsena, e kenyeletsa Morero oa Tsikoane oa Phepelo ea Metsi le Likhoerekhoere, Morero oa Letamo la Metolong, le Morero oa Phepelo ea Metsi le Likhoerekhoere oa Katse-Matsoku-Lejone. Kahoo, Lekala le abetsoe chelete e limilione tse M892.3.



Selemong sena, Lekala la Matla le abetsoe limillion tse M316.0. Kabo ena, e ananela hore mekhoha ea bophelo ba sechaba e fetohile 'me batho ba batla ho sebelisa motlakase le libakeng tse hole le literopo, tse kahare-hare ho naha. Kahoo, 'Muso o tla ntšetsa pele tšebetso ea ho kenya phepelo ea motlakase libakeng tse kathoko ho literopo ka chelete e limilione tse M120.0 ha litereke tse ka Leboea li abetsoe limilione tse M86.5.



Ntlafatso ea Litsela: Litsela ke mokokotlo oa moruo oa naha kaha li thusa sechaba ho fihla litsing tsa phano ea litšebeletso 'me li thusa le ho ntlafatsa maphelo a sechaba. Ka lebaka leo, chelete e limilione tse M916.0 e abetsoe Lekala la Mesebetsi ea Sechaba le Lipalangoang le Lekala la Puso ea Libaka le Borena.



Selemong sa lichelete sa 2017/2018, ho tla ahoa litsela tsa bolelele ba 330 kilometres libakeng tse kathoko ho literopo le litsela tsa bolelele ba 20.3 kilometres literopong. 'Muso o tla tsoela pele ho aha marokho a maoto, tsela e tlohang Ha Leshoele ho ea Mathokoane, tsela e lipakeng tsa Likalaneng le Thaba-Tseka, le ho ntlafatsa maemo a litsela tse ling.

'Muso o itlamme ho ntlafatsa bophelo ba sechaba ka ho etsa matšolo a kentelo, thuto ea sechaba ka bophelo bo botle, toantšo ea mafu a tšoaetsanang le a sa tšoaetsaneng, le koetliso ea basebeletsi ba bophelo. Ha re hopoleng hore Lesotho ke naha ea bobeli lefatšeng e nang le palo e phahameng (25%) ea tšoaetso ea HIV. 'Muso, o sebetsa ka Lekala la Bophelo le ka tšehetso ea bafani, o thakhotse letšolo la Hlahloba u Alafuoe (Test and Treat) naha ka bophara. Re lokela ho tseba hore Lesotho ke naha ea pele, tikolohong e ka Boroa ho Lehoatata la Sahara, e thakhotseng leano la hore batho bohle ba fumanoang ba e-na le tšoaetso ba fumane kalafo ka lipilisi tsa li-ARV hanghang ho sa natsoe palo ea sesole sa 'mele (CD4) le hore na tšoaetso e mothating ofe. Lekala la Bophelo le ekelitse litsi tsa kalafo

ho tloha ho 116 ho isa ho 120, le ho ba le sesiu sa lipilisi tse lekaneng likhoeli tse 'maloa.




Lekala la Thuto le ntse le tobane le liqholotso tsa boleng ba thuto likolong tsa mathomo, khaello ea liphapusi tsa ho ruta bakeng sa palo e ntseng e eketseha ea bana ba qalang ho kena sekolo.

Tabeng ea ntlafatso ea boemo ba thuto ea mathomo, ho tla fanoa ka lichelete tse tla thusa bahlahlobi ba likolo ka sepheo sa ho fana ka tšebetso ho barupeli le batsamaisi ba likolo. Sepheo ke hore bahlahlobi ba tsebe ho etela likolo tsohle tse 341 tse mahareng le likolo tsohle tsa mathomo tse 1478. Bahlahlobi ba tla etsa bonnete ba hore likolo li sebetsa ho latela maano a 'Muso litabeng tsa phepo ea bana likolong, li latela maano a Thuto le Tlhokomelo ea Bana ba Likonyana (ECCD), li latela maano a ho kenyeletsa bana bohle thutong, li bile li latela maano a ho bokella lichelete tse eang 'Musong. Lekala la Thuto le tla abeloa chelete e limilione tse M 2,320.1 selemong sena sa lichelete.



Puso e ntle, tlhompheo ea molao, le toantšo ea bobolu ke litšia tsa puso e ntle ea sechaba. Bobolu ke qholotso e kholo ho linaha tsa lefatše ho kenyeletsa le Lesotho. Lilemong tse peli tse fetileng, 'Muso oa Lesotho o ile oa matlafatsa litšebeliso tsa Lefapha la Toantšo ea Bobolu le Bomenemene (DCEO) ka litsebo tsa ho etsa liphuphutso tse tsoetseng pele, marang-rang, ntlafatso le nchafatso ea liofisi. Lefapha lena le ile la hatela-pele toantšong ea bobolu ka meralo e mecha. Lefapha le se le e-na le matla a ho hapa thepa e fumanoeng ka bobolu 'me hona ho etsa hore batho ba se ke ba ithuisa ka thepa e fumanoeng ka litlolo tsa molao. Lefapha le hatetse pele tšebetsong ea hore basebeletsi bohle ba 'Muso ba phatlalatsa maruo a bona 'me re tšepa hore litho tsa Paramente li tla be li phatlalatsa maruo a tsona pele khoeli ea Loetse, 2017 e fela. Chelete e abetsoeng Lefapha lena e nyolohile ka 40%. 'Muso o tla tsoela pele ka liphetho tsa tsamaiso ea taolo ea lichelete e le ho etsa bonnete ba hore lichelete tse abiloeng li tisa phaphang litšebeliso tse maphelong a sechaba sa Basotho.



TŠEHETSO EA MAFUTSANA LE BATHO BA TLOKOTSING

Leano la Tšireletso ea Sechaba se Tlokotsing le hloaile lithuso tse fuoang bana (Child Grant Programme - CGP) e le ntlha e kaholimo-limo ho tsohle phokotsong ea bofuma, ntlafatsong ea bophelo bo botle ba bana, le thuto ea likhutsana le bana ba tlokotsing. Nakong ea joale, lithuso tse

etsetsoang bana ba tlokotsing li fumanoa litsing tse 36 ho tse 67 tsa makhotla a puso ea libaka. Selemong sena, Banka ea Lefatše e tla thusa Lekala la Ntšetsopele ea Sechaba ho anetsa lithuso litsing tsohle tsa makhotla a puso ea libaka kahara Lesotho.

Tšireletso ea Sechaba se Tlokotsing			
	2016/17	2017/18	% Phetoho
Lipenchene tsa maqheku	580	700	21%
Lithuso tse Fuoang Bana	1710	2140	25%
Kakaretso	2290	2840	46%

MEHATO EA HO FOKOTSA TŠEBELISO EA LICHELETE

E le ho fokotsa tšebeliso ea lichelete tsa sechaba, 'Muso o entse qeto ea ho kenya tšebetsong mehato e latelang:

- Matona le basebeletsi ba bang ba boemong boo ha ba na ho tsamaea ka first class ha ba nka maeto a sefofane;
- Matona ha a na ho nka matsatsi a fetang 7 a le kantle ho Lesotho;
- Matona a fokotse palo ea meifo ea bona ha ba ea liphuthuhong tse kantle ho Lesotho;
- Likoloi tsa Matona tsa li-4x4 li theoleloa boemong bo tlase ka theko;
- 'Muso o tla kena likonterakeng tsa theko ea lisebelisuo le batho kapa lik'hamphani tse fanang ka litheko tse tlase;
- 'Muso o tla ntlafatsa mokhoa oa ho patala likoloto tsa ona. Bangoli ba Baholo ba Makala a 'Muso ba tla fuoa likotlo tsa ho lefisoa ha ba lieha ho patala mekoloto ea lisebelisuo tse rekiloeng;
- 'Muso o tla theha mekhoa e ikemetseng ea ho hlahloba meputso le meropotso ea batho ba hiriloeng ho latela lipolotiki tsa bona;

- 'Muso o tla theha mekhoa ea ho hlahloba meputso ea litsi tseo o nang le seabo ho tsona ka sepheo sa ho hlaola phapano lipakeng tsa meputso ea litsi tseo le Makala a 'Muso;
- Meputso ea basebeletsi ba 'Muso liofising tsa boemeli ba Lesotho kantle ho naha e tla hlahlojoa bocha;
- 'Muso o tla fokotsa lichelete tsa tšebeliso ea lifono le marang-rang ho ba tšehelisoeng ka lichelete tsa mofuta oo;
- Basebeletsi ba 'Muso ba lokela ho sebelisa lifono le marang-rang a nang le polokeho a bile a se litjeo tse holimo;
- Khokahano ea lifono le marang-rang e sebelisoang ha motho a le kantle ho Lesotho e tla lokela ho koaloa 'me e sebelisoa feela mabakeng a potlakileng a bohlokoa;
- Makala le mafapha a 'Muso, likhoebo tsa 'Muso li laeloa ho qala ho hlahloba mekhoa ea ho fokotsa litjeo tsa ho fana ka litšebeliso.

HOBANE'NG SECHABA SE LOKELA HO ALOSA LE HO HLAHLOBA KATLEHO?

Sechaba, le mekhatlo e buellang litokelo tsa sechaba, se na le tokelo ea ho alosa le ho hlahloba phethahatso le katleho ea merero e boletsoeng kabong ea lichelete. Sechaba se khothaletsa ho alosa mesebetsi le litšebeliso tse fanoang. Ho kenya letsoho hoa sechaba tšebetsong ena, ho etsa hore 'Muso o ikutloe o tlameha ho hlalosa hore na o sebelisitse lichelete tsa sechaba mabakeng afe. Hona ho etsa hore sechaba se be le tšepo ho 'Muso mabapi le tšebeliso ea lichelete; ho bile ho etsa hore sechaba se utloisise hore merero ea 'Muso ke ea sona. Kahoo, sechaba se lokela hore khafetsa se kope liofisiri tsa 'Muso, tse laolang tšebeliso ea lichelete tsa sechaba, hore li fane ka litlaleho tsa boemo ba phethahatso ea merero. Literekeng ho lokela hore ho be le

matsatsi ao ho tšoarolang liphutheho tseo sechaba se tla fuoa litlaleho ka tšebetso le litšebeletso tsa 'Muso. Liphutheho tsena tse buletsoeng sechaba sohle, li bohlokoa hobane li fana ka monyetla oa hore sechaba se hlahlobe phethahatso le katleho tse fihletsoeng mabapi le merero ea sechaba.

U KA SEBELISA LITABA TSE HLAHANG BUKANENG EE JOANG?

Kabo ea lichelete e fetoha molao hang ha e fetisitsoe ke Paramente. Ha Paramente e fetisitse likhakanyo tsa lichelete, lichelete tse abiloeng li ka fumanoa Gazetteng ea 'Muso kapa Lekaleng la Molao le Molao le Molao oa Motheo - Khatisono ea 'Muso. Kopi ea Molao oa Kabo ea Lichelete e ka fumanoa leqepheng la marang-rang a 'Muso la: www.gov.ls/www.finance.gov.ls la Lekala la Lichelete.

Selemong se seng le se seng sa lichelete, 'Muso oa Lesotho o hatisa Bukana ea Kabo ea Lichelete e abeloang litereke tsohle le Mekhatlo ea Litokelo tsa Sechaba. Kopi ea Bukana ena e ka fumanoa leqepheng la marang-rang a Lekala la Lichelete.

Ke tokelo ea Mosotho e mong le e mong ho fumana le ho rua tsebo ka kabo ea lichelete tsa sechaba. Buisana le baahisane, liofisiri tsa 'Muso, kapa baetapele ba hao ka lintlha tse hlahang bukaneng ena kapa u buisane ka tsona le batho ba motse oa heno!

Bukana ena e hatsitsoe tlasa bolaoli ba Letona la Lichelete,
Bahlophisi ba baholo: Mongoli e Moholo oa Lekala la Lichelete le Molaoli oa Kabo ea Lichelete
Bakeng sa lipotso ikopanye le: Ms. Maleshoane Lekomola (maleshoane.lekomola@gov.ls)
Tel: 22325920

Bukana e fumaneha leqepheng la marang-rang la Lekala la Lichelete:
<http://www.finance.gov.ls>